

Obediensia ta un kos fásil pa ami.
Obediensia ta un kos masha duru mes pa ami.

E dos frasenan aki ta mustra **kontradiktorio**, pero laga mi mustra abo kiko ami ke men.

Obediensia ta un kos fásil pa ami, pasobra e ta **spiritual**. Den e mundu **spiritual** mi sa 100 porshento ku **Dios Tata** ta den kontrol i sabí tur kos. Es desir ora **Dios Tata** bisa ami bai hasi algu mi ta hasi e kos ei manera **Dios Tata** a bisa ami. Awor ta bini e parti dos ku ta, **Obediensi**a ta un kos masha duru mes pa ami. **Mi no ta biba den un mundu spiritual** pero den un mundu **visibel**. Mi ta mira ku mi wowonan tur kos **visibel** ku ta **kontradiktorio** na loke ami a risibí **spiritual**-mente serka **Dios Tata**. Ta pa esei tin skirbi ku ami mester bira manera un mucha, ami mester **Kambia, Arepentí i Kambia mi pensamentu**, laga **kos bieu** i bira **Nobo** manera un mucha ku tin **Konfiansa**, ta **Humilde i Pordoná** den tur kos, pa ami por drenta **Reino di shelu**. [**Mateo 18:3 AMP**]

Den **Romanonan 5:19** tin skirbi:

Pasobra meskos ku dor di **desobediensi**a di un hende hopi a wòrdu hasí **pekadó**, asina tambe dor di **Obediensi**a di **Esun** hopi lo wòrdu hasí **hustu** i **aseptabel** pa **Dios Tata**.

Nan tabata den paraiso i a haña **spiritual**-mente serka **Dios Tata** tur kos. Tur kos tabata 100 porshento **bon**, te ora nan a "drenta" den e mundu **visibel** i nan por a **mira bunitesa di e fruta** i **purba** kon **dushi e fruta tabata smak**. Pero ser **obediente** ta posibel, pasobra **Mesias Kristu** a **obedesé** i awor ami por tin un relashon **Nobo** ku mi **Tata**.

Mi por hasi tur sorto di **sakrifisio** den e mundu **visibel** aki i hopi lo por mira i gusta, pero si ami no ta **obediente** i **obedesé** mi **Tata** ta ki **probecho** lo mi tin? Manera ta skirbí den Skritura despues di maksimá **120 aña** ami lo no ta riba e mundu **visibel** aki mas, pero lo ta pa **eternidat** den un mundu **spiritual**!. Esaki ke-men ku e mundu **spiritual** ta **mas importante** ku e mundu **visibel**. E mundu **visibel** aki ta temporal, mientras e mundu **spiritual** ta pa **eternidat**. **Tur kos visibel tabata spiritual promé!**

Obediensia ta un kos fásil pa ami, si ami ta den e **bon** i **aseptabel** i **perfekto boluntat** di **Dios**. **Desobediensi**a ta bini ora ami **no** ta den e **bon** i **aseptabel** i **perfekto boluntat** di **Dios**. Ami a disidí di pusha bai dilanti i **obedesé** mi **Tata** den e mundu **visibel** aki te ora mi tempu yega pa bai e mundu **spiritual**.

Den **1 Samuel 15:22** ta skirbi:

"Akaso **SEÑOR** tin mes tantu delisia den ofrendanan kimá i **sakrifisionan** ku den **Obediensi**a na e **bos di SEÑOR**? Mira, **obedesé** ta mihó ku **sakrifisio**, i **skucha** ta mihó ku vèt di karné chubatu."

Nunka lubidá ku, den tur sakrifisio i Obediensi, Dios Tata Su Amor pa abo ta na promé lugá!!!

13 Mei 2016

Sea Bendishoná den e Amor di Yeshua Mesias
Rev. Remsly L Riley